



Sesida dals

Communitgà ils

Protocol nr.

21 d'october 2019

24 d'october 2019

785

Incumbensa Salis

concernent l'instrucziun da saut e da ballet en las scolas da chant e da musica

Resposta da la regenza

La lescha davart la promoziun da la cultura (LPC; DG 494.300) è entrada en vigur il 1. da schaner 2018. Tenor l'art. 19 al. 1 LPC han scolas da chant e da musica che vegnan manadas da las vischnancas u da lur mandatarias il dretg da survegnir contribuziuns. La contribuziun chantunala a las vischnancas importa 30 pertschient dals custs imputabels per uffants e per giuvens creschids fin ch'els han cumplenì il 20. onn da vegliadetgna (art. 19 al. 2 frasa 1 LPC). Ils custs imputabels per unitads d'instrucziun che han il dretg da survegnir contribuziuns vegnan calculads tenor la media da la tariffa da salarisaziun d'ina persuna d'instrucziun da la scola primara plus in supplement procentual per ils custs accessorics (art. 19 al. 3 LPC). Tenor l'art. 16 da l'ordinaziun tar la lescha davart la promoziun da la cultura (ordinaziun davart la promoziun da la cultura, OPC; DG 494.310) vegn la contribuziun per unitad d'instrucziun calculada sin basa da la tariffa per ura cun dretg da survegnir subvenziuns per ina persuna d'instrucziun da la scola primara tenor la lescha davart las scolas popularas dal chantun Grischun (lescha da scola; DG 421.000), plus 20 pertschient custs accessorics al salari sco er 20 pertschient ulteriurs custs. Ina unitad d'instrucziun imputabla dura 60 minutas. Per scolara u scolar dastgan vegnir messas a quint per onn en media maximalmain 14 unitads d'instrucziun. Sin dumonda da l'associaziun da las scolas da chant e da musica dal Grischun (ACMG) po il departament permetter excepziuns (art. 17 OPC). Suenter la scadenza da l'onn chalendar preschentan las vischnancas u las scolas da chant e da musica fin il pli tard la mesadad da favrer al departament ina dumonda, da la quala resorta il dumber da scolaras e scolaras, las unitads d'instrucziun cun dretg da survegnir contribuziuns sco er las contribuziuns annualas da las vischnancas e d'autras corporaziuns da dretg public per mintga singula scola. Sin basa da questa dumonda vegnan pajadas las contribuziuns a las vischnancas u a las singulas scolas. Il chantun surpiglia pajaments parzials da tut en

tut maximalmain 80 pertschient da l'ultim rendaquint disponibel per contribuziuns chantunalas (art. 18 OPC). I po vegnir constatà che l'instrucziun da saut e da ballet na vegn betg menziunada explicitamain en las disposiziuns respectivas da la legislaziun chantunala.

Las sutsegnadras ed ils sutsegnaders pretendan che las directives da la ACMG, inclusiv il sector d'instrucziun, vegnian surpigliadas da princip e ch'i vegnian concedidas sin questa basa er vinavant contribuziuns chantunalas per l'instrucziun da saut e da ballet en las scolas da chant e da musica.

Sin basa da la situaziun giuridica vertenta e suenter in'examinaziun detagliada poi vegnir constatà che la LPC cuntegna ina largia areguard la dumonda, tge unitads d'instrucziun da las scolas da chant e da musica ch'èn concretamain subvenziunablas. Per evitar malsegirezzas giuridicas duai vegnir serrada questa largia cun cumpletter la OPC cun disposiziuns correspudentas. Resguardond las directives da la ACMG che la regenza aveva approvà sut il domini da l'anteriura lescha per promover la cultura, duain vegnir pajadas contribuziuns chantunalas per l'instrucziun da saut e da ballet en scolas da chant e da musica che vegnan manadas da las vischnancas u da lur mandatarias. Applitgond l'art. 18 al. 1 LPC duain plinavant vegnir fixadas cun questa chaschun las prescripziuns davart la gestiun e davart la qualidad da las scolas da chant e da musica. Las consequenzas finanzialas na pon betg vegnir stimadas per il mument, perquai che las vischnancas decidan – er resguardond ina purschida privata –, sche saut e ballet vegnan purschids en ina scola da musica.

Sa basond sin questas explicaziuns propona la regenza al cussegl grond da midar questa incumbensa sco suonda:

Tras ina revisiun parziala da la OPC stgaffescha la regenza la basa giuridica per sustegnair l'instrucziun da saut e da ballet en scolas da chant e da musica che vegnan manadas da las vischnancas u da lur mandatarias. Plinavant fixescha la regenza prescripziuns davart la gestiun e davart la qualidad da las scolas da chant e da musica.



En num da la Regenza

Il president:

Il cancellier:

Dr. Jon Domenic Parolini

Daniel Spadin